

Henti bermain 'api', bangkit bersama demi negara

BH/21.03.23 / M/S 13

Amirul Salam
Hasan,
Universiti
Malaysia
Terengganu

Malaysia adalah sebuah negara dengan kepelbagaian bangsa, agama, budaya serta adat resam. Keharmonian bumi bertuah ini masih utuh walaupun beberapa kali berlaku insiden yang cuba meranapkan perpaduan dan keharmonian dalam kalangan masyarakatnya.

Semangat kekitaan dan kebersamaan terjalin antara kaum di negara ini turut dicemburui oleh sebilangan bukan warganegara serta pendatang yang hanya inginkan kemanisan bumi bertuah ini.

Selepas Perdana Menteri pertama, Tunku Abdul Rahman Putra melaungkan frasa keramat merdeka pada tanggal 31 Ogos 1957, perlahan-lahan semangat kenegaraan kian merosot selari dengan peradaran masa.

Ia mungkin berpunca daripada sikap sebahagian kita yang tidak pernah menyelami erti kemerdekaan sebenar. Malah, ada segelintir ahli masyarakat yang sengaja meniupkan api perbalahan dan permusuhan antara kaum. Tindakan ini sangat berbahaya, malah ia mungkin mampu memberi te-

kanan dan mencabar Perlembagaan negara.

Kita tentu maklum mengenai tragedi berdarah 13 Mei 1969 yang mengorbankan hampir 200 nyawa. Ia cukup mengajar kita erti toleransi antara kaum. Namun, nilai murni perlu sentiasa diterapkan ke dalam jiwa setiap anak Malaysia dan semangat ini perlu dipupuk tanpa mengira umur, sama ada pada peringkat lewat usia hingga ke kanak-kanak tadika.

Baru-baru ini misalnya seorang bekas atlet negara melontarkan kata-kata bersifat perkauman melalui laman media sosial. Menurut portal dalam talian yang melaporkan tindakan itu, kenyataan perkauman dibuat dengan mengaitkan prestasi merudum pemain badminton negara disebabkan pengurusan yang dikendalikan oleh orang Melayu.

Tanamkan semangat patriotik dalam jiwa

Ia kemudiannya dipanjangkan lagi dengan kenyataan tuntutan solat lima waktu yang menjadi amalan agama Islam melemahkan pengurusan sekali gus menyebabkan Persatuan Badminton Malaysia gagal diuruskan dengan baik.

Sebagai seorang warganegara yang sepatutnya berupaya memahami kepelbagaian kepercayaan dan budaya negara ini, tindakan individu itu memuat naik, mengeluarkan kata-kata provokasi melampau dan memainkan sentimen perkauman sangat jelas menggugat keharmonian kaum.

Belajarlah erti bersyukur dengan membaca, mencari dan membedah Perlembagaan negara. Telaah sejarah pembentukan negara yang berdaulat ini supaya pengetahuan itu menjadi asas kepada semangat patriotisme dalam jiwa.

Usaha untuk bermain api tidak memberikan apa-apa, malah hanya merugikan individu, kumpulan, bangsa dan seterusnya mencetuskan ketidakstabilan dalam negara.

Kita seharusnya bangkit bersama-sama untuk mara ke hadapan dengan mengetepikan perbezaan pandangan sebaliknya meletakkan kepentingan negara di kedudukan pertama. Semua ini akan menjamin keharmonian, kesejahteraan yang dimiliki akan terus segar melangkaui zaman dan perubahan teknologi.